



Ameasa Droga Dezafiu ba Instituisaun Siguransa atu Kombate

Mahein Nia Lian Nú. 74, 7 Abril 2014



Relatoriu Fundasaun Mahein Nia Hanoin ne'e suporta husi povu Amerikanu liu husi Ajénsia Estadus Unidus ba Dezenvolvimentu Internasional (USAID) no Embaxada Finlandia iha Jakarta.

Vizaun husi autor sira ne'ebé expresa iha publikasaun relatoriu sira ne'e la reprezenta vizaun husi Ajénsia Estadus Unidus ba Dezenvolvimentu Internasional (USAID) no Embaxada Finlandia.



Website: www.fundasaunmahein.org

Kontiudu Sira

Introdusaun	3
Metodolojia	3
Invazaun Droga no Rekrutamentu ba Timor oan	4
Droga Invade Timor-Leste	4
Droga halo Rekrutamentu ba Timor oan	5
Sasidik Sira Kona-bá Kombate Droga	7
Trafiku Droga la Regula	7
Frajilidade Kontrolu iha Area Fronteira	8
Sumariu Rekomendasaun	9
Bibliografia	10

Introdusaun

Iha fulan Setembru 2013 nia rohan mosu insidenti grave tebes iha sidade Dili, grupu ida naran KIBATA halo asaun organizadu, sona mate joven ida iha Markoni no hakanek ema na'in rua seluk iha area Kampung Alor no Fatuhada. Fundasaun Mahein nia relatoriu identifika katak autór hirak ne'e hemu tua kahor ho droga no fuma ganja depois ba halo asaun krime.¹ Maibe ikus mai polisia rejeita katak autór (KIBATA) la involve iha trafiku droga.

Fundasaun Mahein (FM) konsidera grupo KIBATA konsege rekruta husi grupu intelektual krime organizadu nian hodi involve joven sira iha atividade trafiku droga hodi estraga sira nia hanoin atu destroi estabilidade nasional. Droga nu'udar aimoruk *sintetis no semi sintetis* ne'ebé bele kauza hodi hamenus ka halakon sentimentu tauk no bele muda ema nia mentalidade atu depende konsumu aimoruk ne'e ba bei-beik.² Portantu droga bele halo ema kontenti iha tempu oituan deit maibe sei sofre ba tempu naruk nia laran.

Hare fila fali husi tinan 2012 ba kotuk droga tama naba-naban iha Timor-Leste ne'ebé mobiliza husi sindikatu internasional droga. Sidadaun estranjeiru sira lori tama droga liu husi liña legal, tama iha Aeroportu Internasional Nicolau Lobato – Dili, hafoin pasa revista hetan no balun la konsege detekta, ikus maka kaptura fila fali iha Otel sira iha Kapital Dili.³ Kondisaun ida ne'e halo droga tenki invade Timor-Leste no halo rekrutamentu ba Timor oan balun sai tiha kurir droga, distributor no mos konsumudor.

FM preokupa maka'as kona-bá sindikatu internasional ne'ebé halo mobilizasaun droga hodi hatama mai iha Timor-Leste. Tanba konsidera droga nu'udar krime transnasiona ne'ebé lori ameasa seriu ba futuru nasaun RDTL, bele estraga joven sira nia vida no lori sira hodi involve iha krime organizadu hodi dezestabiliza siguransa nasional.

Metodolojia

Metodolojia ne'ebé adopta iha relatoriu ne'e mai husi diskusaun sira iha ekipa peskizador Fundasaun Mahein nian ho metodu *Security Sector Discussion – SSD*. Relatoriu ne'e nu'udar rezultadu monitorizasaun durante tinan 2009 – 2013 nian liu husi rekolla informasaun no análiza deskriptivu sira ba relatoriu dahuluk sira kona-bá trafiku droga, inklui dadus sira husi media nasional no internasional sira.

Ikus liu husi relatoriu ne'e pontu rekomendasaun sira ba Governu oinsa funu hasoru droga liu husi kriasaun lei droga nian no funsionamentu instituisaun siguransa atu kontrola movimentu droga liu husi rede nasional no internasional sira.

¹ Fundasaun Mahein (2013. Outubru. 03). Forma Foun Operasaun Krime Organizadu iha Timor-Leste. Mahein nia Lian Nú 60.pdf.

² Definisaun Droga tuir Lei Indonezia nian "Undang - Undang Republik Indonesia Nomor 22 Tahun 1997 Tentang Narkotika. <http://www.dinkesjatengprov.go.id/download/uu/Peraturan-Farmasi/UU-narkotika.pdf>

³ Fundasaun Mahein (2013. Feveiru. 13). Jestaun Fronteira no Kontrolu Migratoriu. Mahein nia hanoin Nú 03. Mahein nian Lian Nú. 03.pdf.

Invazaun Droga no Rekrutamentu ba Timor oan

1. Droga Invade Timor-Leste

Hanesan hateten tiha ona iha relatoriu dahuluk Fundasaun Mahein 2010 kona-bá operasaun krime organizadu iha Timor-Leste katak iha tinan 2008 PNTL halo identifikasaun ba Bar sira iha kapital Dili no detekta, Bar, Restaurante, Diskotik no studio Tato balu sai hanesan fatin transaksaun droga. Ema hirak ne'ebé halo transaksaun droga maioria ho sidadaun Indonezia, sira nia serbisu iha Dili maka hanesan halo prosesu transaksaun fa'an droga ba joven sira iha bar no mos iha studio Tato balu iha Dili.

Iha 2009 to'o 2010 PNTL no parte Serbisu Migrasaun hala'o operasaun ba Bar no diskoteka sira iha Dili laran. Tuir Komandante Serbisu Investigasaun Kriminal Superintendenti Calisto Gonzaga hateten iha operasaun konjunta ne'e konsege kaptura ema estranjeiru ne'ebé lori droga ho modelu oin-oin no haruka ona Tribunal atu prosesu. Antes ne'e polisia mos kaer ona sidadaun Indonezia na'in rua ne'ebé hetan kaptura, serbisu iha kompañia balun iha Dili ne'ebé detekta husi Serbisu Investigasaun Kriminal katak sidadaun Indonezia na'in rua ne'e sai importador no mos distributor droga.⁴

Maske halo kapturasaun masal ba ema estranjeiru illegal sira iha Bar no Diskoteka sira iha Kapital Dili maibe droga kontinua tama mai iha Timor-Leste. Iha fulan Outubru 2012 PNTL kaptura ona sidadaun estranjeiru na'in hat husi Indonezia ho sidadaun Afrika ida ne'ebé kaer pasaporte Mozambique, lori tama droga mai Timor-Leste. Sidadaun hirak ne'e hatama droga liu husi Aviaun Silk Air husi rute Singapura mai Dili no polisia kaptura iha Otel sira iha Dili.⁵

Iha loron 18 Outubru 2012, PNTL halo kapturasaun ba sidadaun Indonezia na'in tolu ho inisial "RS", "S", no "AT" iha Otel Central Dili. Inklui sidadaun Indonezia ida ho inisial "MAR" ne'ebé Autoridade Timor-Leste kaptura ho droga sabu-sabu pasta ida, iha loron 19 Outubru 2012. Iha loron ida ne'e kaptura mos sidadaun Afrika do Sul iha Otel Ventura tanba deskonfia nia maka entrega pasta refere ba "MAR" atu lori.

Kontinua iha loron 20 Outubru 2012 PNTL kaptura tan suspeitu ida iha Aero Portu Comoro ne'ebé lori droga pasta ida hatama iha vagazen Silk Air rute Sigapura – Dili. Nune'e mos iha loron 25 Outubru 2012 trafikku droga ida husi Afrika do Sul liu husi India tama hikas mai Timor-Leste, hafoin liu loron ida polisia transfere suspeitu droga na'in lima seluk ba Indonezia.⁶

Bazeia ba kazu mobilizasaun droga ne'ebé identifika iha leten bele indika Timor-Leste iha ona ameasa trafikku droga nia laran. Tuir Fundasaun Mahein nia peskiza dahuluk detekta katak

⁴ Fundasaun Mahein (2010. Novembru. 10). *Kejahatan Terorganisir di Timor-Leste*. Mahein nia Lian Nú 14.pdf.

⁵ Tempo Semanal. (2012. Outubru. 23). Xanana Hahi PNTL husu labele Perdua Droga Tan Liu Husi Dili Semo Liu Ba Indo ho Australia. <http://temposemanaltimor.blogspot.com/2012/10/xanana-hahi-pntl-husu-labele-perdua.html>

⁶ Jnx. (2012. Outubru. 25). Sei Intrega Kurir Droga Ba Indonezia. <http://www.diariutimorpost.tl/berita-304-sei-intrega-kurir-droga-ba-indonezia.html>

frajilidade siguransa iha area fronteira (terestre, maritima no aero) sai fatór kontribui ba krime organizadu partikularmente trafiku droga ne'ebé infiltra maka'as iha Timor-Leste.⁷

2. Droga halo Rekrutamentu ba Timor oan

Tuir Monitorizasaun ne'ebé Fundasaun Mahein halo durante ne'e identifika katak droga komesa rekruta ona Timor oan balun hodi involve iha krime organizadu. Iha Momentu ida ne'ebé ema frustradu ho ezijensia nesesidade moris lor-loron nia relasiona situasaun sosial no ekonomia ne'ebé laiha balansu. Obriga joven sira involve an iha trafiku droga no rede krime organizadu mos aproveita hodi rekruta sira atu halo krime.

Hanesan mosu insidenti ida ne'ebé grave tebe-tebes iha loron 24 Setembru 2013 husi grupu ida naran KIBATA sona mate joven iha Markoni no hakanek na'in rua seluk iha area Kampu Alor no Fatuhada, ne'ebé deskonfia autór hemu tua kahor ho droga no fuma ganja.⁸ Esplika liu tan katak autór ho inisial "J" nu'udar patraun obralan no nia fen ema Indonezia, ne'ebé deskonfia "J" nu'udar Bandar droga iha relasaun diak ho Bandar droga Indonezia nian.

Kazu seluk fali maka hanesan grupu ida ne'ebé halo tentativa ataka hasoru diplomata Amerikanu ida besik portaun entrada ba Embaixada Amerika iha Praia dos Kokeirus Dili, ne'ebé deskonfia autór konsume droga. Nune'e mos autór refere deskonfia nu'udar familia ema boot no klase ekonomia mediu sira.⁹ Dala ruma mos droga rekruta ona membru siguransa balun (PNTL no F-FDTL) hodi involve iha trafiku droga.

Krime droga nu'udar krime trasnasionál ho rede internasionál ne'ebé lori ameasa sériu ba joventude no dezenvolvimentu sociedade iha Timor-Leste.¹⁰ Maske seidak iha peskiza kle'an kona-bá kuantidade trafiku droga iha Timor-Leste maibe iha parte balun atividade droga rekruta ona joven Timor oan balun sai rede atividade transaksaun droga.

Iha evidensia ne'ebé notifika katak artista Juga Frans Xavier Gama (Juga Gama) ne'ebé PNTL kaptura iha loron 11 Dezembru 2012 iha nia uma no prende droga sabu-sabu kuaze 200-ital grama inklui osan. Kazu refere Autór Juga Gama simu ona sentensa husi tribunal no submete ona ba komarka.¹¹ Maibe iha loron 3 Novembru 2013 Juga Gama ho prizioneiru hamutuk 24

⁷ Fundasaun Mahein (2013. Feveireu. 13). Jestaun Fronteira no Kontrolu Migratoriu. Mahein nia hanoin Nú 03. Mahein nian Lian Nú. 03.pdf.

⁸ Fundasaun Mahein (2013. Outubru. 03). Forma Foun Operasaun Krime Organizadu iha Timor-Leste. Mahein nia Lian Nú 60.pdf.

⁹ Tempo Semanal. (2012. Outubru. 23). Xanana Hahi PNTL husu labele Perdua Droga Tan Liu Husi Dili Semo Liu Ba Indo ho Australia. <http://temposemanaltimor.blogspot.com/2012/10/xanana-hahi-pntl-husu-labele-perdua.html>

¹⁰ JSMP Timor-Leste. (2013. Jullu. 12). Programa Monitorizasaun Sistema Judisiál iha Timor-Leste. Komunikadu Impreza.

¹¹ Soares, Timotio. (2013. Setembru. 17). Deskonfia Involve Transaksaun Droga Artista TL Juga Gama Amesasa Kastigu Tinan 14. <http://suara-timor-lorosae.com/deskonfia-involve-transaksaun-droga-artista-tl-juga-gama-amesa-kastigu-tinan-14/>

halai sai husi komarka,¹² to'o relatoriu ne'e publika autór droga Juga Gama sedauk kaptura fila fali no sei livre hela no la hatene nia paradeiru iha ne'ebé.

Nune'e mos drogadu Timor oan balun komesa kria ona ligasaun ho ema estranjeiru sira hodi simu importasaun droga liu husi rede ne'ebé bandar droga sira estabelese ona. Konforme kronolojia kazu ne'ebé hasai husi Jornal Tempo Semanal katak suspeitu ho inisial "JS" iha kontratu droga ho sidadaun Singapura no Australianu ne'ebé PNTL kaptura iha loron 8 Janeiru 2013. Iha kapturasaun ne'e PNTL prende osan U\$. 180.00 inklui aimoruk droga (sabu-sabu). Depois investiga tiha ba "JS", Polisia investigasaun kaptura tan Marito C "Picapau" ho evidensia osan montante U\$. 645.00, inklui seringa sona, pibet, no sabu sabu hamutuk 6,5 grama iha ninia hela fatin Santa Cruz, Dili.¹³

Bazeia ba kazu droga hirak ne'ebé mensional iha leten hatudu katak trafiku droga sai ona problema seriu tanba hamosu ona rede transaksaun. Maske peskiza sedauk kle'an hodi deskobre Timor oan ne'ebé komsumu droga maibe tuir rezultadu peskiza Fundasaun Timor Hari'i (FTH) iha 2013 informa katak, joven Timor oan hamutuk ema nain 44 maka utiliza ona droga no klasifika joven mane nain 38 no feto 6.¹⁴

Asunto droga sai ona atensan públiku no loka ema hotu nia hanoin preokupa tanba konsidera bele estraga joven sira nia futuru ba nasaun ida ne'e. Tuir Dom Alberto Ricardo da Silva (Bispu Diocese Dili) hatete, Timor oan presiza fo apelu ba malu hodi hadook an husi trafiku droga tanba ai moruk droga bele estraga ema nia vida no juventude sira nia futuru ba nasaun Timor Leste.¹⁵

Fundasaun Mahein senti katak problema droga sai ona problema nasional no konsidera hanoin hirak ne'e nu'udar funu hasoru droga ne'ebé Governu no Estadu preokupa.¹⁶ Hanesan kestaun ne'ebé hato'o husi Eis Prezidenti José Ramos Horta, ne'ebé ameasa no la tolera hasoru sidadaun estranjeiru ne'ebé hetan lori droga tama iha Timor-Leste ne'ebé iha objetivu atu estraga povu Timor-Leste.¹⁷

Iha sorin seluk, tuir Deputadu Estansilau da Silva hateten, droga nu'udar problema nasional ne'ebé Governu tenki hola medida konkreta ruma hodi kontrola importasaun aimoruk droga ne'ebé ilegalmente tama iha Timor-Leste.¹⁸ Nune'e mos Prezidenti CNJTL Leovigildo Hornai katak, presiza halo kontrolu masimu iha liña fronteira maritima no terestre inklui lei droga

¹² Da Costa, Joana. (2013. Novembru. 04). Prijioneiru Bekora Revolta 24 Halai, Ida Kanek Todan. Jornal Independenti, Arkivu Fundasaun Mahein 2013.

¹³Tempo Semanal. (2013. Janeiru. 27). Bandar Droga Iha Santa Cruz Tama Prizaun. <http://temposemanal.com/justisa/item/38-bandar-droga-ih-santa-cruz-tama-prizaun>

¹⁴ Claudio. (2013. Juñu. 27). Joven 44 Utiliza Droga. <http://timoroman.com/joven-44-utiliza-droga/>

¹⁵ Gusmão Timotio & Sanches Tomas. (2013. Agostu. 05). Alberto Husu Timor oan Labele Involve an iha Droga. <http://suara-timor-lorosae.com/d-alberto-husu-timor-oan-labele-involve-aan-ih-droga/>

¹⁶ Fundasaun Mahein (2012. Dezembru. 20). Militar ho Funu Hasoru Droga: Lisaun Husi Mexico. <http://www.fundasaunmahein.org/?s=Funu+hasoru+droga&x=0&y=0>

¹⁷ Bdy. (2010. Marsu. 03). Droga Ameasa Jovens iha TL. Jornal Diariu Nasional. Arkivu FM 2010.

¹⁸ Sequeira, Jacinta. (2013. Agostu. 05). PN Husu Governu Hola Medidas Kontrola Importasaun Droga. <http://suara-timor-lorosae.com/pn-husu-governu-hola-medidas-kontrola-importasaun-droga/>

nu'udar instrumentu legal ne'ebé fo kbi'it no poder lejitimu ba instituisaun Estadu, atu halo ezekusaun hodi kombate droga iha Timor-Leste.¹⁹

Sasidik Sira Kona-bá Kombate Droga

1. Trafiku Droga la Regula

Maske durante ne'e, operasaun PNTL halo esforsu maka'as hodi kaptura ema sira ne'ebé hala'o atividade droga iha Timor-Leste no rezulta ona autór balun tama kadeia maibe lei ba droga nu'udar sasidik atu kombate asaun droga iha Timor-Leste. Tuir Fundasaun Mahein observasaun maske atividade droga sai ona problema nasional maibe seidauk iha lei ida atu regulariza asaun refere. Nune'e kazu kona-bá trafiku droga sei uza lei husi nasaun seluk nia maka lori prosesu ba krime droga.

Ezemplu kazu ne'e hatudu Tribunal Distritu Dili fo sentensa ba autór trafiku droga, Edi Prasetyo Tribunal kondena prizaun tinan 14 no Hanny Haryawan prizaun tinan 8. Ministru publiku akuza arguidu sira nu'udar autór material ba kazu krime kontra droga artigu 81 Lei Indonezia Nú. 22/1997 lei kona-bá anti narkotika.²⁰

Inklui kazu hanesan tribunal hamonu sentesa ba Juga Gama tinan 10 prizaun no kustus judisiál \$ 50.00, arguida Desi Alex Lenko tinan 8 prizaun no kustus judisiál \$ 50.00, Sri Darmayanti ba tinan 6 fulan 6 prizaun no kustus judisiál \$ 50.00, arguidu Dionísio Francisco da Silva kondena pena únika tinan 7 fulan 6 prizaun no kustus judisiál \$ 30.00 no arguidu Anastacio Pereira Soriano hetan pena únika tinan 6 fulan 6 kadeia no selu kustus judisiál \$30.00. Sentensa hirak ne'e tribunal kondena bazeia ba lei Indonezia nian Nú. 22/1997 kona-bá narkotika liu-liu artigu artigu 81 (a) no 82 (a).²¹

Tanba ne'e tenki kria lei esepifiku kona-bá krime droga nia nune'e bele fo lejitimidade hodi kombate droga iha Timor-Leste. Tuir Vice-Presidenti CNJTL Maria Didi Magno katak atu kombate trafiku droga iha Timor-Leste Estadu no Governu presiza kria lei ne'ebé rigoroza kona-bá droga.²² Nune'e mos Xefe Departamentu Politika Legislativa DNAJL (Direasaun Nasional Assesoria Juridiku no Lejislasaun), Honorio Mangalhães hatete lei kona-bá kontra droga ne'e nesesidade tebes atu regula atividade droga iha Timor-Leste hodi salva foin sa'e Timor-oan sira husi trafiku droga.²³

¹⁹ Gusmão, Timotio. (2013. Agostu. 28). TL Sai Terminal Tranzitu Ba Transaksaun Droga | Presiza kontrola Makas Iha Protu- Fronteira. <http://suara-timor-lorosae.com/tl-sai-terminal-tranzitu-ba-transaksaun-droga-presiza-kontrola-makas-iha-protu-fronteira/>

²⁰ JSMP – Timor-Leste (2013. Jullu. 12). Tribunál Distritál Díli kondena tinan 14 prizaun ba sidadaun Indonézia ba krime droga. Komunikadu Imprensa.

²¹ JSMP – Timor-Leste (2013. Jullu. 12). Tribunál kondena arguidu na'in 7 ba kazu krime droga husi tinan 1 too tinan 10 prizaun. Komunikadu Imprensa.

²² Gusmão, Timotio. (2013. Jullu. 19). Kombate Droga TL, Governu Presija Kria Lei Regiroju. <http://suara-timor-lorosae.com/kombate-droga-tl-governu-presija-kria-lei-regiroju/>

²³ Florindo – DNAJL (2013. Juñu. 24). Ekipa Lejilador Timor-oan DNAJL Aprejenta no Diskuti Projeitu Lei Kona-bá Exekuzaun Pena, Trafiku Humano no Droga. <http://www.mj.gov.tl/?q=node/374>

Fundasaun Mahein mos hanoin katak kriaun lei kona-bá droga ne'e importante tebes atu regula trafiku droga iha Timor-Leste, tanba krime droga rekruta ona joven balun hodi komete iha krime organizadu no trafiku droga ne'ebé la regula bele sai ameasa ba estabilidade nasional. Maibe esbosu lei kona-bá trafiku droga no komsumu ilisitiu droga ne'ebé ekipa DNAJL produs ona iha 2013, la hatene nia paradeiru to'o iha ne'ebé ona? Maske iha diskusaun meja kabuar iha loron 17, 20 no 24 fulan Juñu 2013 iha Centro Formação Jurídico, Caicoli, Dili, ekipa DNAJL apresenta katak draff lei kona-bá trafiku droga sei finaliza iha tinan 2013 hodi lori ba Konsellu Ministru atu hetan aprovasaun antes lori ba Parlamentu Nasional.²⁴

2. Frajilidade Kontrolu iha Area Fronteira

Sistema kontrolu no siguransa ba krime transnacional iha area fronteira Timor-Leste nian ne'ebé nakloke (fraku) konvida krime organizadu sira partikularmente trafiku droga bele aproveita oportunidade atu atraveza ilegalmente iha liña fronteira hodi hala'o atividade transaksaun droga iha Timor-Leste. Dalabalu trafikante droga internasional sira uza Timor-Leste tama hanesan zona tranzitu liu husi Aero-Portu no ita nia rai ketan no mos liu husi fronteira maritima.²⁵

Kazu hirak ne'e hatudu grupu krime organizadu sira hatama droga halo transaksaun ilegal iha tasi Atauro no Dili, liu husi rede peskador wainhira sira halo peska hasoru malu iha tempu kalan.²⁶ Nune'e mos kazu seluk ne'ebé notifika katak droga tama ilegalmente liu husi odamatan fronteira terrestre entre Timor-Leste no Indonezia nian, iha rede koordinasaun ne'ebé estrukturadu tebes husi drogadu Timor oan balun ne'ebé hela iha Kupang no Atambua hamutuk ho oknum TNI hodi distribui droga mai iha Timor-Leste.²⁷

Inklui kazu balun ne'ebé hateten ona pajina inisiu, sindikatu internasional halo mobilizasaun droga liu husi aviaun Silk Air rute Singapura – Dili no tun iha aeroportu Nicolau Lobato Comoro, Dili maibe, autoridade siguransa iha aero portu la detekta hafoin kaptura fila fali iha Otel sira iha Kapital Dili.²⁸

Hetok at liu, nasaun viziñu Indonezia konsidera Timor-Leste nu'udar fatin tranzitu droga hodi tama ba Indonezia atraveza fronteira terrestre liu husi Distritu Belu - Indonezia. Xefi Departamentu Narkotika Nasional Republika Indonezia, (BNN) Provinsia NTT (Nusa Tenggara Timur), Aloysius Dando hatete inisiativa atu kombate droga la'os serbisu BNN nia deit maibe

²⁴ Florindo – DNAJL (2013. Juñu. 24). Ekipa Lejilador Timor-oan DNAJL Aprejenta no Diskuti Projeitu Lei Kona-bá Exekusaun Pena, Trafiku Humano no Droga. <http://www.mj.gov.tl/?q=node/374>

²⁵ Fundasaun Mahein. (2012. Dezembru. 20). Militar Ho Funu Hasoru Droga: "Lisaun Husi Mexico". <http://www.fundasaunmahein.org/2012/12/20/the-military-and-the-war-on-drugs-%E2%80%9Clessons-from-mexico%E2%80%9D/>

²⁶ Fundasaun Mahein (2013. Feveiru. 13). Jestaun Fronteira no Kontrolu Migratoriu. Mahein nia hanoin Nú 03. Mahein nian Lian Nú. 03.pdf.

²⁷ Tempo Semanal. (2010. Dezembru. 03). Eis Milisia Ho Eis TNI Hatama Droga Mai TL. <http://temposemanaltimor.blogspot.com/2010/12/eis-milisia-ho-eis-tni-hatama-droga-mai.html>

²⁸ Fundasaun Mahein (2013. Feveiru. 13). Jestaun Fronteira no Kontrolu Migratoriu. Mahein nia hanoin Nú 03. Mahein nian Lian Nú. 03.pdf.

komponente hotu-hotu inklui estudante no familia sira tenki iha komitmentu forte funu hasoru droga. Tanba area fronteira sai sensitivu ba droga fasil atu atraveza.²⁹

Sumariu Rekomendasaun

1. Rekomenda ba Ministeriu Justisa atu aselera esbosu lei kona-bá trafiku droga no konsumu ilisitiu droga nian ba Konsellu Ministru.
2. Rekomenda autoridade siguransa UPF, UPM, Serbisu Migrasaun, Alfandega no Kuarentina atu kria liña koordinasaun serbisu integradu hodi kontrolu droga sira ne'ebé tama-sai iha Timor-Leste.

²⁹ Yon. (2014. Marsu. 22). Belu Jalur Utama Narkoba dari RDTL. <http://kupang.tribunnews.com/2014/03/22/belu-jalur-utama-narkoba-dari-rdtl>

Bibliografia

- Bdy. (2010. Marsu. 03). Droga Ameasa Jovens iha TL. Jornal Diariu Nasional. Arkivu FM 2010.
- Claudio. (2013. Juñu. 27). Joven 44 Utiliza Droga. <http://timoroman.com/joven-44-utiliza-droga/>
- Undang - Undang Republik Indonesia Nomor 22 Tahun 1997 Tentang Narkotika. <http://www.dinkesjatengprov.go.id/download/uu/Peraturan-Farmasi/UU-narkotika.pdf>
- Da Costa, Joana. (2013. Novembru. 04). Prijioneiru Bekora Revolta 24 Halai, Ida Kanek Todan. Jornal Independenti, Arkivu Fundasaun Mahein 2013.
- Fundasaun Mahein (2013. Feveireiru. 13). Jestaun Fronteira no Kontrolu Migratoriu. Mahein nia hanoin Nú 03. Mahein nian Lian Nú. 03.pdf.
- Florindo – DNAJL (2013. Juñu. 24). Ekipa Lejilador Timor-oan DNAJL Aprejenta no Diskuti Projeitu Lei Kona-bá Exekusaun Pena, Trafiku Humano no Droga. <http://www.mj.gov.tl/?q=node/374>
- Fundasaun Mahein (2013. Outubru. 03). Forma Foun Operasaun Krime Organizadu iha Timor-Leste. Mahein nia Lian Nú 60.pdf.
- Fundasaun Mahein. (2012. Dezembru. 20). Militar Ho Funu Hasoru Droga: “Lisaun Husi Mexico”. <http://www.fundasaunmahein.org/2012/12/20/the-military-and-the-war-on-drugs-%E2%80%9Clessons-from-mexico%E2%80%9D/>
- Fundasaun Mahein (2010. Novembru. 10). Kejahatan Terorganisir di Timor-Leste. Mahein nia Lian Nú 14.pdf.
- Gusmão Timotio & Sanches Tomas. (2013. Agostu. 05). Alberto Husu Timor oan Labele Involve an iha Droga. <http://suara-timor-lorosae.com/d-alberto-husu-timor-oan-labele-involve-aan-ih-droga/>
- Gusmão, Timotio. (2013. Jullu. 19). Kombate Droga TL, Governu Presija Kria Lei Regiroju. <http://suara-timor-lorosae.com/kombate-droga-tl-governu-presija-kria-lei-regiroju/>
- Gusmão, Timotio. (2013. Agostu. 28). TL Sai Terminal Tranzitu Ba Transaksaun Droga Presiza kontrola Makas Iha Protu- Fronteira. <http://suara-timor-lorosae.com/tl-sai-terminal-tranzitu-ba-transaksaun-droga-presiza-kontrola-makas-ih-protu-fronteira/>
- JSMP – Timor-Leste (2013. Jullu. 12). Tribunál Distritál Díli kondena tinan 14 prizaun ba sidadaun Indonézia ba krime droga. Komunikadu Imprensa.pdf.

- Jnx. (2012. Outubru. 25). Sei Intrega Kurir Droga Ba Indonezia. <http://www.diariutimorpost.tl/berita-304-sei-intrega-kurir-droga-ba-indonezia.html>
- JSMP – Timor-Leste (2013. Jullu. 12). Tribunál kondena arguidu na'in 7 ba kazu krime droga husi tinan 1 too tinan 10 prizaun. Komunikadu Impresa.pdf.
- Sequeira, Jacinta. (2013. Agostu. 05). PN Husu Governu Hola Medidas Kontrola Importasaun Droga. <http://suara-timor-lorosae.com/pn-husu-governu-hola-medidas-kontrola-importasaun-droga/>
- Soares, Timotio. (2013. Setembru. 17). Deskonfia Involve Transaksaun Dorga Artista TL Juga Gama Amesa Kastigu Tinan 14. <http://suara-timor-lorosae.com/deskonfia-involve-transaksaun-dorga-artista-tl-juga-gama-amesa-kastigu-tinan-14/>
- Tempo Semanal. (2013. Janeiru. 27). Bandar Droga Iha Santa Cruz Tama Prizaun. <http://temposemanal.com/justisa/item/38-bandar-droga-ih-santa-cruz-tama-prizaun>
- Tempo Semanal. (2012. Outubru. 23). Xanana Hahi PNTL husu labele Perdua Droga Tan Liu Husi Dili Semo Liu Ba Indo ho Australia. <http://temposemanaltimor.blogspot.com/2012/10/xanana-hahi-pntl-husu-labele-perdua.html>
- Tempo Semanal. (2010. Dezembru. 03). Eis Milisia Ho Eis TNI Hatama Droga Mai TL. <http://temposemanaltimor.blogspot.com/2010/12/eis-milisia-ho-eis-tni-hatama-droga-mai.html>